

Mga Reperensia Para sa *Pagkabuhi kag Pagministeryo* *nga Workbook Para sa Miting*

MAYO 2-8

MGA BAHANDI SA PULONG SANG DIOS | 1 SAMUEL 27-29

“Ang Estratehiya ni David sa Pagpakig-away”

it-1-E 41

Akis

Sang nagpalagyo si David kay Saul, duha ka bes-ses sia nga nakakadto sa teritoryo ni Hari Akis. Sang una nga bes, sang ginsuspetsahan sia nga kaaway, nagpakunokuno si David nga buang. Gani ginpalakat sia ni Akis kay para sa iya indi man makahalalit si David. (1Sa 21:10-15; Sa 34:Sup; 56:Sup) Sang ikaduha nga bes nga pagkadto niya, upod ni David ang 600 ka soldado kag ang ila mga pamilya, gani ginhatag ni Akis ang Ziklag para istaran nila. Sa sulod sang isa ka tuig kag apat ka bulan nga nag-istar sila didto, abi ni Akis ginsalakay ni David kag sang iya mga tinawo ang mga banwa sang Juda, pero ang ginsalakay nila amo ang mga Gesurnon, Girzinhon, kag Amaleknon. (1Sa 27:1-12) Napapati gid ni David si Akis amo nga ginhimo sia ni Akis nga personal nga bantay sang nagaplano ang mga Filistinhon nga salakayon si Hari Saul. Sang ulihi na lang ginpabalik si David kag ang iya mga tinawo sa Ziklag bangod sa pagpamilit sang “mga ginuo” sang mga Filistinhon. (1Sa 28:2; 29:1-11) Sang nangin hari si David kag nakig-away sa Gat, wala ginpatay si Akis. Buhi pa sia asta sa tion sang paggahom ni Solomon.—1Ha 2:39-41; tan-awa ang GAT.

w21.03 4 ¶8

**Mga Pamatan-on nga Lalaki, Ano ang Dapat
Ninyo Himuon Para Saligan Kamo?**

⁸Nakaeksperiensia si David sang isa pa ka ma-budlay nga sitwasyon. Bisan pa ginhaplasan na si David nga mangin hari, naghulat pa sia sing ma-

damo nga tinuig antes sia nagsugod sa pagga-hom bilang hari sang Juda. (1 Sam. 16:13; 2 Sam. 2:3, 4) Ano ang nakabulig sa iya nga maghulat kag mangin mapinasensiahon? Sa baylo nga magpokus sa mga butang nga nagpaluya sang iya buot, nagpokus si David sa mga puede niya himuon. Halimbawa, sang nalagyo si David kag nag-istar sia sa teritoryo sang mga Filistinhon, gingamit niya ang iya tion para magpakig-away sa mga kaaway sang Israel. Bangod sang iya mga ginhimo, naamligan niya ang mga dulunan sang teritoryo sang Juda.—1 Sam. 27:1-12.

it-2-E 245 ¶6

Kabutigan

Bisan pa ginapakamalaut sang Biblia ang pagbinutig, wala ini nagakahulugan nga obligado ang isa nga isugid ang tanan nga impormasyon sa mga tawo nga wala sing kinamatarong sa sini. Si Jesucristo nagsiling: “Indi ninyo pagihatag ang mga butang nga iya sang Dios sa mga ido, ukon ihaboy ang inyo mga perlas sa mga baboy, kay basi tasakon lamang nila ini kag halitan kamo.” (Mat 7:6) Gani may mga tion nga wala ni Jesus ginasugid ang tanan nga impormasyon ukon ginasabat ang pila ka pamangkot kon kabalo sia nga magaresulta ini sa kahalitan. (Mat 15:1-6; 21:23-27; Ju 7:3-10) Gani ang ginhimo nanday Abraham, Isaac, Rahab, kag Eliseo sang wala nila ginsugid ang matuod ukon wala nila ginsugid ang tanan nga impormasyon sa mga wala nagasimba kay Jehova dapat man tamdon sa sini nga paagi.—Ge 12:10-19; kap 20; 26:1-10; Jos 2:1-6; San 2:25; 2Ha 6:11-23.

Espirituwal nga mga Hiyas

w10 1/1 20 ¶5-6

Makabulig Bala ang mga Patay sa Buhi?

Pamensara ini: Ang Biblia nagsiling nga kon mapatay ang tawo ‘nagabalik sia sa duta’ kag

“nagakawala [ukon nagakadula] ang iya mga hunahuna.” (Salmo 146:4) Nahibal-an ni Saul kag ni Samuel nga ginapakamalaut sang Dios ang pagpangayo sing bulig sa mga espiritista. Si Saul pa gani ang nagpahalin sa mga espiritista sa Israel sang una!—Levitico 19:31.

Pamensara bala: Kon espiritu gid man ato ni Samuel, lapason bala niya ang sugo sang Dios kag magkooperar sa espiritista para maistorya si Saul? Isa pa, indi na gusto ni Jehova nga mag-istorya kay Saul. Masarangan bala sang espiritista nga piliton ang Labing Gamhanan nga Dios nga makig-istorya kay Saul paagi sa patay nga si Samuel? Indi gid. Kon amo, ini nga “Samuel” indi ang matutom nga propeta sang Dios. Isa ato ka espiritu ukon malaut nga demonyo nga nagpakunokuno lang nga si Samuel.

MAYO 9-15

MGA BAHANDI SA PULONG SANG DIOS | 1 SAMUEL 30-31

“Pabakura ang Imo Kaugalingon Paagi sa Bulig ni Jehova nga Imo Dios”

w06 8/1 28 ¶12

Kahadluki si Jehova—Mangin Malipayon!

¹² Ang kahadlok ni David kay Jehova wala lamang nagpugong sa iya sa paghimo sing malain. Nagpalig-on man ini sa iya sa paghimo sing determinado kag maalamon nga desisyon sa idalom sang mabudlay nga mga kahimtangan. Sa sulod sang isa ka tuig kag apat ka bulan, bangod sa pagpalagyo kay Saul, si David kag ang iya mga tinawo nagdangop sa Ziklag, sa kaumhan sang Filistia. (1 Samuel 27:5-7) Isa ka bes, sang wala ang mga lalaki, ginsunog sang guban sang Amaleknong mga manugati ang ciudad kag gindala nga bihag ang mga asawa, kabataan, kag panong sang mga lalaki. Sang nagbalik si David kag ang iya mga tinawo, naghibi sila sang nakita nila ang natabo.

Ang ila kasubo nangin kaakig, kag nagsiling ang mga tinawo ni David nga batuhon sia. Bisan pa napiutan si David, wala sia nadulaan sing paglaum. (Hulubaton 24:10) Ang iya kahadlok sa Dios nagpahulag sa iya sa pagpangayo sing bulig kay Jehova, kag “ginpalig-on niya ang iya kaugalingon paagi kay Jehova.” Paagi sa bulig sang Dios, nalagas ni David kag sang iya mga tinawo ang mga Amaleknong kag nakuha nila liwat ang tanan nga ginkuha sa ila.—1 Samuel 30:1-20.

w12 4/15 30 ¶14

Ginatipigan Kita ni Jehova Para sa Aton Kaluwasan

¹⁴ Madamo sing mabudlay nga mga inagihan si David. (1 Sam. 30:3-6) Ginpakita sang Biblia nga nahibalan ni Jehova ang iya balatyagon. (**Basaha ang Salmo 34:18; 56:8.**) Nahibalan man sang Dios ang aton mga balatyagon. Kon ‘boong ang aton tagiposoon kag espiritu,’ magapalapit sia sa aton. Ini mismo makapaumpaw na sa aton, pareho kay David, nga nag-amba: “Magakasadya ako kag magakalipay sa imo malig-on nga paghigugma, kay nakita mo ang akon kapipit-an, nakilala mo ang akon kalag sa kalalat-an.” (Sal. 31:7) Apang wala lamang matalupangdan ni Jehova ang aton mga kahuol. Ginasakdag man niya kita paagi sa pagpaumpaw kag pagpalig-on sa aton. Ang isa ka paagi amo ang Cristianong mga miting.

Espirituwal nga mga Hiyas

w05 3/15 24 ¶8

Talalupangdon nga mga Punto Gikan sa Tulun-an nga Nahaunang Samuel

30:23, 24. Ining desisyon nga ginpasad sa Numeros 31:27, nagapakita nga hamili kay Jehova ang mga nagaalagad sa indi tanto ka promidente nga mga palangakuan sa kongregasyon. Gani, ano man ang aton ginahimo, ‘himuon naton ini sing bug-os kalag subong nga kay Jehova, kag indi sa mga tawo.’—Colosas 3:23.

MGA BAHANDI SA PULONG SANG DIOS | 2 SAMUEL 1-3

“Ano ang Matun-an Naton sa ‘Ang Pana’?”

w00 6/15 13 ¶9

Padunggi ang mga Ginhatagan sing Awtoridad sa Inyo

9 Nagkalisod bala si David samtang ginamaltrato sia? “May . . . mga manugpigis nga nagtinguha sang akon kalag,” tuaw ni David kay Jehova. (Salmo 54:3) Ginpabutyag niya ang iya tagipusuon kay Jehova: “Luwasa ako sa akon mga kaaway, O Dios ko . . . Ang mga makusog nagasalakay sa akon, indi bangod sa akon pagribok, ni sa ano man nga akon sala, O Jehova. Bisan pa nga wala sing kasaypanan, nagadala-gan sila kag nagapangaman. Magmata ka sa akon pagpanawag kag tan-awa.” (Salmo 59:1-4) Nabatyagan mo na bala ini—nga wala ikaw sing malain nga ginhimo sa tawo nga may awtoridad, apang padayon niya ikaw nga ginapabudlayan? Si David pirme gid nagpakita sing pagtahod kay Saul. Sang napatay si Saul, sa baylo nga mag-udyak sa kalipay, si David nagkomposo sing isa ka panalabiton: “Si Saul kag si Jonatan, ang mga hiligugmaon kag manayanaya sang nagakabuhi sila . . . Madasig pa sila sa mga agila, makusog pa sila sa mga leon. Kamo nga mga babayi nga anak sang Israel, hibii ninyo si Saul.” (2 Samuel 1:23, 24) Daw ano kaayo nga halimbawa sang hanuot nga pagtahod sa hinaplas ni Jehova, bisan pa nga si David ginhimuan sing sala ni Saul!

w12 4/15 10 ¶8

Pagluib—Talalupangdon nga Tanda sang mga Tion!

8 Ang Biblia nagsambit man sang madamo nga halimbawa sang mainunungon nga mga tawo. Binagbinagon naton ang duha sa ila kag hiba-luon kon ano ang aton matun-an. Unahon naton isa ka tawo nga nag-unong kay David. Si Jonatan, nga subang ni Hari Saul, amo kuntani

ang manunubli sang trono sang Israel. Apang si David ang ginpili ni Jehova nga mangin hari sang Israel. Gintahod ni Jonatan ang desisyon sang Dios, kag imbes nga mahisa kay David, “ang kalag ni Jonatan natingub sa kalag ni David” kag nagsaad sia nga mangin mainunungon sa iya. Ginhatag pa gani niya kay David ang iya kunop, espada, pana, kag wagkus bilang pagpadungog sa iya. (1 Sam. 18:1-4) Ginhimo niya ang tanan niya nga masarangan agod ‘pabakuron ang kamot ni David,’ kag ginbutang pa gani ang iya kabuhi sa katalagman agod lamang mamligan si David batok kay Saul. Mainunungon nga ginsilingan niya si David: “Ikaw magahari sa ibabaw sang Israel, kag ako magadason sa imo.” (1 Sam. 20:30-34; 23:16, 17) Gani indi katingalahan nga sang napatay si Jonatan, ginpabutyag ni David ang iya kalisod kag gugma sa iya paagi sa isa ka panalambiton.—2 Sam. 1: 17, 26.

Espirituwal nga mga Hiyas

it-1-E 369 ¶2 Utod

Ang tinaga nga “utod” nagapatuhoy man sa mga tawo nga may isa ka katuyuan kag pareho sing interes kag tulumuron. Halimbawa, gintawag ni Hari Hiram sang Tiro si Hari Solomon nga iya utod, indi lamang bangod tupong ang ila ranggo ukon posisyon kundi mahimo bangod pareho ang ila interes nga magsuplay sing mga kahoy kag iban pa nga butang para sa templo. (1Ha 9:13; 5:1-12) “Tuman kaayo kag tuman katom kon ang mag-ulutod magkabuhi nga may paghiusa!” siling ni David. Ginapakita sini nga indi lamang ang kaangtanan bilang magkadugo ang makahatag sing paghidait kag paghiusa sa mga mag-utod sa unod. (Sa 133:1) Ang matuod, gintawag ni David si Jonatan nga iya utod indi bangod isa ang ila ginikanan, kundi bangod nagapalanggaanay sila kag pareho ang ila tulumuron. (2Sa 1:26) Ang mga magkaupod nga pareho sing kinaiya kag batasan, bisan pa malain ini, matawag man nga mag-utod.—Hul 18:9.

MAYO 23-29

**MGA BAHANDI SA PULONG SANG DIOS |
2 SAMUEL 4-6**

**“Hupti ang Nagakaigo nga Kahadlok nga
Indi Mapahamut-an si Jehova”**

w05 5/15 17 ¶8

**Talalupangdon nga mga Punto sa Tulun-an
nga Ikaduhang Samuel**

6:1-7. Bisan pa maayo ang tinutuyo ni David, ang pagtinguha niya nga sayluhon ang Kaban sa karo supak sa sugo sang Dios kag napaslawan ini. (Exodo 25:13, 14; Numeros 4:15, 19; 7: 7-9) Ang pag-uyat ni Uza sa Kaban nagapakita man nga indi mabag-o sang maayong mga tinutuyo ang mga ginapatuman sang Dios.

w05 2/1 27 ¶120

**Ginahimo Pirme ni Jehova
Kon Ano ang Husto**

²⁰ Dumduma nga dapat nahibaluan kuntani ni Uza ang Kasuguan. Ginarepresentar sang Kaban ang presensia ni Jehova. Ang Kasuguan nagsiling nga indi ini dapat tandugon sang indi awtorisado nga mga indibiduwal, nagapaandam ini sing maathag nga ang magalapas pagasilutan sing kamatayon. (Numeros 4:18-20; 7:89) Busa, ang pagsaylo sa sining Kaban indi dapat pagpakadiutayon. Si Uza maathag nga isa ka Levinhon (apang indi isa ka saserdote), amo nga dapat pamilyar kuntani sia sa Kasuguan. Isa pa, mga tinuig antes sini ang Kaban ginsaylo sa balay sang iya amay para matago. (1 Samuel 6:20–7:1) Nagtener ini didto sa sulod sing mga 70 ka tuig, tubtob nga nagdesisyon si David nga sayluhon ini. Amo nga halin sang bata pa sia, pat-od nga nahibaluan gid ni Uza ang mga kasuguan may kaangtanan sa Kaban.

w05 2/1 27 ¶121

**Ginahimo Pirme ni Jehova
Kon Ano ang Husto**

²¹ Subong sang nasambit sa umpisa, mabasa ni Jehova ang tagipusuon. Sanglit gintawag sang iya Pulong ang ginhimo ni Uza subong “walay pagtahod nga buhat,” mahimo nga may nakita si Jehova nga makagod nga motibo nga wala ginpahayag sa kasaysayan. Indi ayhan makahas nga tawo si Uza, nga masami nagalapas sa makatarunganon nga mga pagdumili? (Hulubaton 11:2) Indi ayhan nga ang iya dayag nga pag-ubay sa Kaban nga ginbantayan anay sang iya pamilya sing pribado nagpabayag sa iya sing pagkaimportante? (Hulubaton 8:13) Indi ayhan nakulangan sing pagtuo si Uza amo nga naghunahuna sia nga malip-ot katama ang kamot ni Jehova sa pagbalanse sang Kaban nga nagasimbulo sang Iya presensia? Bisan ano man ang rason, makasalig kita nga ginhimo ni Jehova kon ano ang husto. Mahimo nga may nakita sia sa tagipusuon ni Uza nga nagpahulag sa Iya sa paghukom sing madagmit.—Hulubaton 21:2.

Espirituwal nga mga Hiyas

w96 4/1 29 ¶1

**Itugyan Pirme ang Inyo Lulan
kay Jehova**

Si David subong hari dapat manabat sa sini. Ang iya reaksion nagapakita nga bisan yadtong may maayong kaangtanan kay Jehova maka-buhat kon kaisa sing dimaayo sa mabudlay nga mga kahimtangan. Primero naakig si David. Nian hinadlukan sia. (2 Samuel 6:8, 9) Ang iya masinaligon nga kaangtanan kay Jehova gintilawan sing daku. Diri sini nga hitabo nga daw napaslawan sia sa pagtugyan sang iya lulan kay Jehova, sang wala niya ginsunod ang iya mga kasuguan. Amo bala sina ang aton kahimtangan kon kaisa? Ginabasol bala naton si

Jehova sa mga problema nga nagaresulta bangod ginasiway naton ang iya mga instruksion?—Hulubaton 19:3.

MAYO 30–HUNYO 5

MGA BAHANDI SA PULONG SANG DIOS | 2 SAMUEL 7-8

“Si Jehova Nakigkatipan kay David”

w10 4/1 20 ¶3

“Magapadayon ang Imo Ginharian sa Wala sing Katapusan”

Nalipay gid si Jehova sa handum ni David. Bangod sa iya katutom, nakigkatipan ang Dios sa iya. Subong sang gintagna, may isa sa iya kaliwatan nga magahari sing walay katapusan. Ini nga promisa sang Dios ginsugid ni Natan kay David: “Magapadayon ang imo ginharian sa wala sing katapusan, kag ang imo mga kaliwat magahari hasta san-o.” (Bersikulo 16) Sin-o ang permanente nga Manunubli sini nga katipan, ang Isa nga magagahom sing walay katapusan?—Salmo 89:20, 29, 34-36.

w10 4/1 20 ¶4

“Magapadayon ang Imo Ginharian sa Wala sing Katapusan”

Si Jesus nga taga-Nazaret kaliwat ni David. Sang ginpahibalo sang anghel ang pagkabun-ag ni Jesus, sia nagsiling: “Ihatag sa iya ni Jehova nga Dios ang trono ni David nga iya amay, kag magahari sia sa panimalay ni Jacob sing dayon, kag ang iya ginharian wala sing katapusan.” (Lucas 1:32, 33) Gani, ang katipan sang Dios kay David natuman kay Jesucristo. Wala si Jesus ginpili sang mga tawo. Ginhatagan sia sing kinamatarong nga maggahom sing walay katapusan bangod sa promisa sang Dios. Dumdumon naton nga ang promisa sang Dios wala gid nagakapas-lawan.—Isaias 55:10, 11.

w14 10/15 10 ¶14

Palig-una ang Imo Pagtuo sa Ginharian

¹⁴ Binagbinaga ang ginsaad ni Jehova kay Hari David sang dumaan nga Israel paagi sa **katipan kay David**. (Basaha ang 2 Samuel 7:12, 16.) Ginhimo ni Jehova ini nga katipan kay David sang naggahom sia sa Jerusalem, nga nagasaad nga mangin kaliwat niya ang Mesias. (Luc. 1: 30-33) Gani gin-athag pa gid ni Jehova ang pagahalinan sang kaliwat kag ginpat-od nga ang manunubli ni David amo ang “may kinamatarung” sa trono sang Mesianiko nga Ginharian. (Ezeq. 21:25-27) Paagi kay Jesus, ang paghari ni David mangin ‘malig-on sa gihapon.’ Ang kaliwat ni David “magapadayon sa gihapon, ang iya trono subong sang adlaw.” (Sal. 89:34-37) Huo, ang paggahom sang Mesias indi gid mangin malain, kag ang himuon sini magapadayon tubtob sa walay katapusan!

Espirituwal nga mga Hiyas

it-2-E 206 ¶2

Katapusan nga mga Adlaw

Taga ni Balaam. Antes magsulod ang mga Israelinhon sa Ginsaad nga Duta, ginsilingan ni propeta Balaam si Hari Balak sang Moab: “Dali diri kag ipahibalo ko sa imo kon ano ang himuon sini nga katawhan [ang Israel] sa imo katawhan sa palaabuton [ukon “sa katapusan sang mga adlaw,” footnote]. . . . Isa ka bituon ang magagua halin kay Jacob, kag isa ka setro ang magatindog halin sa Israel. Buk-on niya ang ulo ni Moab, kag ang bagol sang tanan nga magamo nga mga anak.” (Nu 24:14-17) Sa una nga katumanan sini nga taga, ang “bituon” amo si Hari David, ang nagpierce sa mga Moabnon. (2Sa 8:2) Gani sa una nga katumanan sini nga taga, nagsugod ang “katapusan sang mga adlaw” sang nangin hari si David. Bangod si David ang nagalandong kay Jesus bilang Mesianikong Hari, matuman man ini nga taga kay Jesus kon mapierce na niya ang iya mga kaaway.—Isa 9:7; Sa 2:8, 9.

HUNYO 6-12

MGA BAHANDI SA PULONG SANG DIOS | 2 SAMUEL 9-10

“Si David Nagpakita sing Mainunungon nga Gugma”

w06 6/15 14 ¶16

Huo, Masapwan Mo ang Kalipay

“Malipayon ang nagapatugsiling sa kubos,” su-lat ni David. Nagpadayon sia: “Sa adlaw sang kalamidad si Jehova magaaman sing kaluwasan para sa iya. Si Jehova mismo magabantay sa iya kag magamlig sa iya nga buhi. Ipahayag sia nga malipayon.” (Salmo 41:1, 2) Ang mahigugmaon nga patugsiling nga ginpakita ni David kay Mefiboset, ang piang nga anak sang hinigugma nga abyan ni David nga si Jonatan, isa ka huwaran sang husto nga panimuot nga dapat ipakita sa isa nga kubos.—2 Samuel 9: 1-13.

w05 5/15 17 ¶12

Talalupangdon nga mga Punto sa Tulun-an
nga Ikaduhang Samuel

9:1, 6, 7. Gintuman ni David ang iya saad. Dapat man kita manikasog nga tumanon ang aton ginsaad.

w02 2/15 14 ¶10

Nabatas Nila ang mga Ungon sa Ila Unod

¹⁰ Pagligad sang mga pila ka tuig, bangod sang daku nga gugma ni Hari David kay Jonatan, ginpakitaan niya sing mahigugmaon nga kaayo si Mefiboset. Ginhatag ni David ang tanan nga pagkabutang ni Saul sa iya kag gintugyan ang alagad ni Saul nga si Siba subong manugdumala sining duta. Ginsilingan man ni David si Mefiboset: “Ikaw magakaon sa akon latok sing dalayon.” (2 Samuel 9:6-10) Pat-od gid nga ang mahigugmaon nga kaayo ni David naglipay kay Mefiboset kag nagpahaganhagan sa kasakit sang iya pagkainutil. Daw ano kaayo nga lek-

sion! Dapat man naton pakitaan sing kaayo ang mga nagabatas sing ungon sa unod.

Espirituwal nga mga Hiyas

it-1-E 266

Bungot

Sa mga tawo sa dumaan nga Sidlangan, pati na sa mga Israelinhon, ang bungot importante nga tanda sang dignidad sang isa ka lalaki. Sa kasuguan sang Dios sa Israel, ginadumili ang pagbarbas sang “patilya,” ang buhok sa ulot sang dulunggan kag mata, pati na ang pag-utod sang punta sang bungot. (Le 19:27; 21:5) Ginadumili ini bangod ang pagpangbarbas naangot sadto sa relihioso nga pagsimba sang mga pagano.

HUNYO 13-19

MGA BAHANDI SA PULONG SANG DIOS | 2 SAMUEL 11-12

“Pakigbatui ang Indi Nagakaigo nga mga Handum”

w21.06 17 ¶10

Makapalagyo Ka sa mga Siod sang Yawa!

¹⁰ Madamo sang ginhatag si Jehova kay David. Ginhatagan niya sia sang madamo nga manggad, ginhimo niya sia nga hari, kag ginbuligan niya sia nga magdaug sa madamo nga inaway. Ginpasalamatan gid ni David ang Dios, kag nag-siling sia nga ‘indi niya masarangan nga isugid’ ang tanan nga ginhatag sang Dios sa iya bangod tam-an ini ‘kadamo.’ (Sal. 40:5) Pero nanging makagod si David kag gusto niya nga sobra pa sa ginhatag ni Jehova ang mabaton niya. Bisan pa madamo na sang asawa si David, ginhandum pa niya si Bat-seba nga asawa ni Urias nga Hethanon. Naghulid si David kay Bat-seba, kag nagbusong si Bat-seba. Malain gid ang ginhimo ni David, pero may ginhimo pa gid sia nga mas malain pa sa sini. Naghimo si David sang plano para mapatay si Urias. (2 Sam.

11:2-15) Daw indi mapatihan ang ginhimo ni David. Nalipat bala sia nga makita sia ni Jehova? Madugay na nga nagaalagad si David kay Jehova, pero nangin makagod sia gihapon gani nag-antos gid sia. Sang ulihi, maayo lang kay gin-aku ni David ang iya sala kag naghinulsol sia. Nagpasalamat gid sia kay ginpatawad sia ni Jehova.—2 Sam. 12:7-13.

w19.09 17 ¶15

Kinabubut-on nga Magpasakop kay Jehova

¹⁵ Gintangdo ni Jehova si David nga mangin ulo, indi lang sang iya kaugalingon nga pamilya, kundi sang bilog gid nga pungsod sang Israel. Bilang hari, daku ang awtoridad ni David. May mga tion nga gingamit niya sa indi maayo ang iya awtoridad kag nakahimo sia sang serio nga mga sala. (2 Sam. 11:14, 15) Pero nagpasakop sia kay Jehova paagi sa pagbaton sang disiplina. Nangamuyo sia kay Jehova kag ginpabutyag niya ang tanan niya nga ginabat-yag. Kag ginpanikasugan gid niya nga tumanon ang laygay ni Jehova. (Sal. 51:1-4) Dugang pa, mapainubuson gid sia kay ginbaton niya, indi lang ang maayo nga mga panugda sang mga lalaki, kundi pati man sang mga babayi. (1 Sam. 19:11, 12; 25:32, 33) Nakatuon si David sa iya mga sala kag ginhimo niya nga pinakaimportante sa iya kabuhi ang pag-alagad kay Jehova.

w18.06 17 ¶17

Hanasa ang Imo Konsiensia Paagi sa mga Kasuguan kag mga Prinsipio sang Dios

⁷ Para matun-an naton kon ano ang maayo ukon malain, indi na kinahanglan nga mag-antos kita kay ginlapas naton ang mga kasuguan sang Dios. Puede naton matun-an ang mga sayop sang iban nga ginrekord sa Pulong sang Dios. Ang Hulubaton 1:5 nagasiling: “Ang maalam nga tawo nagapamati kag nagabaton sing dugang pa nga pagtudlo.” Nabaton

naton ang pinakamaayo nga panudlo halin sa Dios, ilabi na kon ginabasa naton kag ginapamalandungan ang mga hitabo nga ginrekord sa Biblia. Halimbawa, handurawa kon daw ano ang pag-antos ni Hari David sang ginlapas niya ang sugo ni Jehova kag nakighilahi kay Batseba. (2 Sam. 12:7-14) Kon ginabasa naton ini kag ginapamalandungan, mahimo pamangkuton naton ang aton kaugalingon: ‘Paano kunta ni nalikawan ni Hari David nga makapakighilahi kay Batseba kag ang mga problema nga resulta sini? Kon maatubang ko ini nga sahi sang pagsulay, may kabakod bala ako nga sikwayon ini? Magapalagyo bala ako pareho ni Jose, ukon masulay pareho ni David?’ (Gen. 39:11-15) Kon pamalandungan naton ang malain nga epekto sang sala, mapabakod naton ang aton tagipusuon nga ‘dumtan ang malain.’

Espirituwal nga mga Hiyas

it-1-E 590 ¶1

David

Pero nakita ni Jehova ang tanan kag ginbudyag niya ang tama kalain nga natabo. Kon gintugutan ni Jehova nga mga tawo nga hukom base sa Mosaikong Kasuguan ang magauyat sang kaso ni David kag ni Batseba, patyon gid tani sila nga duha, kag ang wala pa mabunag nga bata nga resulta sang pagpanghilahi natapatay man kuntani upod sa iya iloy. (Deu 5:18; 22:22) Pero si Jehova mismo ang nag-uyat sang kaso kag ginkaluy-an niya si David bangod sa katipan para sa Ginharian (2Sa 7:11-16). Ginhimo ini ni Jehova mahimo bangod nagpakita man sing kaluoy si David (1Sa 24:4-7; ipaanggid ang San 2:13) kag bangod nakita Niya ang paghinulsol sang mga nakasala. (Sa 51:1-4) Pero wala sila nakalikaw sa tanan nga silot. Paagi kay propeta Natan, si Jehova nagsiling: “Magatuga ako sing kagamo sa imo halin mismo sa imo panimalay.”—2Sa 12:1-12.

HUNYO 20-26

MGA BAHANDI SA PULONG SANG DIOS | 2 SAMUEL 13-14

“Ang Kakagod ni Amnon May Malain Gid nga Resulta”

it-1-E 32

Absalom

Pagpatay kay Amnon. Matahom gid ang utod ni Absalom nga si Tamar, gani naluyag sa iya ang iya magulang nga utod sa amay nga si Amnon. Nagpakunokuno si Amnon nga naga-masakit para kadtuan sia ni Tamar sa iya balay kag lutuan sia, dayon ginlugos niya si Tamar. Bangod ang gusto lang ni Amnon amo nga makigsekso kay Tamar, ang iya kaluyag nabuslan sang kaakig kag gintabog niya si Tamar paggua. Gingisi ni Tamar ang iya malaba nga bayo nga may gurayguray nga amo ang ginasuksok sang birhen nga mga anak sang hari. Dayon ginbutangan niya sing abo ang iya ulo. Sang nasugata sia ni Absalom, nahunahuna sini dayon nga may malain nga natabo, kag ginsuspetsahan niya si Amnon kay kabalo sia nga naluyag ini sa iya utod. Ginsilingan ni Absalom ang iya utod nga indi pag-isugid ang natabo, dayon gindala niya sia kag ginpaistar sa iya balay.—2Sa 13:1-20.

w17.09 5 ¶11

Palambua ang Pagpugong sa Kaugalingon

¹¹ May mga halimbawa man sa Biblia sang mga wala nagpugong sang ila kaugalingon sa paghimo sang seksuwal nga imoralidad, kag masubo ang mga resulta sini. Kon pareho ang imo sitwasyon kay Kim, pamalandungi ang natabo sa pamatan-on nga madali mahaylo nga ginsambit sa Hulubaton kapitulo 7. Hunahunaa man ang ginhimo ni Amnon kag ang malain nga resulta sini. (2 Sam. 13:1, 2, 10-15, 28-32) Ini nga mga halimbawa sa Biblia mahimo binagbinagon sang mga ginikanan sa pangpamilya nga pagsimba para buligan ang ila kabataan

nga mapalambo ang pagpugong sa kaugalingon kag makatigayon sing kaalam parte sa pagpakigrelasyon.

it-1-E 33 ¶1

Absalom

Pagligad sang duha ka tuig, nag-abot ang tion sang pagpang-alot nga isa ka masadya nga okasyon. Naghanda si Absalom sing sinalusalo sa Baal-hazor nga mga 22 ka kilometro AAS sang Jerusalem. Gin-agda niya ang tanan nga anak nga lalaki sang hari kag si David mismo. Sang nangindi ang iya amay nga magkadto, namilit si Absalom nga pakadtuon si Amnon, ang subang nga bata ni David. (Hul 10:18) Sa tion sang sinalusalo, sang “masadya si Amnon bangod sang alak,” ginsugo ni Absalom ang iya mga alagad nga patyon si Amnon. Ang iban nga anak ni David nagbalik sa Jerusalem, kag si Absalom nagpalagyo kag nagkadto sa iya Sirianhon nga lolo sa ginharian sang Gesur sa S sang Dagat sang Galilea. (2Sa 13:23-38) Ang “espada” nga gintagna ni propeta Natan nagsulod na sa “panimalay” ni David kag nagpabilin ini tubtob buhi sia.—2Sa 12:10.

Espirituwal nga mga Hiyas

g04-E 12/22 8-9

Ang Pinakamanami nga Klase sang Katahom

Pero tuhay gid ang isa sa mga anak ni David nga si Absalom. Guapo sia, galing kalain gid sang iya batasan. Ang Biblia nagsiling parte sa iya: “Wala sing tawo nga pareho ka guapo kay Absalom sa bug-os nga Israel kag ginadayaw gid sia. Wala sia sing depekto halin sa dapadapa tubtob sa ulo.” (2 Samuel 14:25) Pero bangod sa ambisyon, nagrebelde si Absalom sa iya amay kag gin-agaw ang pagkahari. Naghulid pa gani sia sa mga babayi sang iya amay. Gani naakig ang Dios kay Absalom kag napatay sia.—2 Samuel 15:10-14; 16:13-22; 17:14; 18:9, 15.

Nanamian ka bala kay Absalom? Wala gid, kay malain sia nga klase sang tawo. Wala sing pulos ang iya kaguapo bangod hambog sia kag indi mainunungon. Ang iya kaguapo wala nakaluwas sa iya sa kamatayon. Madamo sing halimbawa sa Biblia sang mga tawo nga maa-lam kag maayo ang batasan, pero wala sini ginsambit ang ila pisikal nga hitsura. Ginapa-kita sini nga mas importante ang ila nasulod nga katahom.

HUNYO 27–HULYO 3

MGA BAHANDI SA PULONG SANG DIOS | 2 SAMUEL 15-17

“Si Absalom Nagrebelde Bangod sa Bugal”

it-1-E 860

Nagauna

Kinabatasan na sadto sa mga taga-Sidlangan nga may nagadalagan sa unahan sang kangga sang hari para magpahibalo sang iya pag-abot kag magbulig sa iya. (1Sa 8:11) Para sundon ang ginahimo nga pagpadungog sa hari kag ipakita nga may nagasuporta sa ila pagrebelde, nagpili sanday Absalom kag Adonias sing 50 ka lalaki para magdalagan sa unahan sang ila kangga.—2Sa 15:1; 1Ha 1:5; tan-awa ang MANUGDALAGAN.

w12 7/15 13 ¶15

Mag-alagad sa Dios sang Kahilwayan

⁵ Sa Biblia, madamo sing halimbawa parte sa mga tawo nga may malain nga impluwensia sa iban. Isa sa ila amo si Absalom, ang anak ni Hari David. Si Absalom guapo katama. Apang sang ulihi, kaangay ni Satanas, gintugutan niya nga magtubo ang iya makagod nga ambisyon. Ginhandum niya ang trono sang iya amay, nga indi para sa iya. Para maagaw ang pagkahari, nagpakunokuno si Absalom nga nabalaka gid sia sa mga Israelinhon kag ginpabatyag niya nga indi interesado ang hari sa ila. Pareho sang Yawa sa hardin sang Eden, ginpagua ni Absa-

lom nga nagaulikid gid sia ila. Ginguba man niya ang reputasyon sang iya amay.—2 Sam. 15:1-5.

it-1-E 1083-1084

Hebron

Pagligad sang pila ka tuig, ang anak ni David nga si Absalom nagbalik sa Hebron. Diri niya ginsugdan ang pag-agaw sa pagkahari sang iya amay pero wala sia nagmadinalag-on. (2Sa 15:7-10) Ginpili ni Absalom ini nga ciudad para sugdan ang iya kampanya sa pag-agaw sang pagkahari, mahimo bangod sa kasaysayan sang Hebron nga kapital sadto sang Juda, kag bangod diri sia nagdaku. Sang ulihi, gintukod ini liwat sang apo ni David nga si Hari Rehoboam. (2Cr 11:5-10) Pagkatapos ginsalakay sang mga taga-Babilonia ang Juda kag nakabalik na ang tinapok nga mga Judiyo, ang pila sa ila nag-istar sa Hebron (Kiryat-arba).—Ne 11:25.

Espirituwal nga mga Hiyas

w18.08 6 ¶11

**Matuod Bala ang Impormasyon
nga Nabaton Mo?**

¹¹ Mahimo nga nakaeksperiensia man kita nga may nagpalapta sing balita parte sa aton nga indi bug-os nga matuod. Binagbinaga ang natabo kay Hari David kag kay Mefiboset. Ginpakitaan ni David sing kaayo si Mefiboset sang ginbalik niya sa iya ang tanan nga duta sang iya lolo nga si Saul. (2 Sam. 9:6, 7) Pero sang ulihi, nakabati si David sang indi maayo nga balita parte kay Mefiboset. Wala niya gin-usisa kon bala matuod ini, kag nagdesisyon sia nga kuhaon ang tanan nga ginapanag-iyahan ni Mefiboset. (2 Sam. 16:1-4) Sang ulihi sang nakighambal na sia kay Mefiboset, natukiban niya nga nagsala gali sia, gani ginbalik niya ang pila ka ginapanag-iyahan ni Mefiboset. (2 Sam. 19:24-29) Nalikawan kuntani ni David ini nga sala kon gintinguhaan niya anay nga mabal-an ang matuod nga natabo sa baylo nga nagpa-dasudaso sa pagdesisyon base sa indi kompleto nga impormasyon.